

太上洞玄灵宝定福消灾司命真经

凡诵经者。切要诚心。按章朗诵。逐句静唵。经文虽短。
经旨实深。包罗圣训。广作良箴。

一时持念。三界仰钦。常存敬凜。永沐昭临。九龙圣水。沛泽
光明。尘寰浊秽。悉澄清。

一念涌虔诚。敷衍真詮。推落众魔精。皈命常清常静大天尊。

静心神咒

太上台星。应变无停。驱邪缚魅。保命护身。智慧明净。
心神安宁。三魂永久。魄无丧倾。急急如律令。

净口神咒

丹朱口神。吐秽除气。舌神正伦。通命养神。罗千齿神。
却邪卫真。喉神虎贲。气神引津。心神丹元。令我通真。
思神鍊液。道气长存。急急如律令。

净身神咒

灵宝天尊。安慰身形。弟子魂魄。五脏玄冥。青龙白虎。
队仗纷纷。朱雀玄武。侍卫我身。急急如律令。

安土地咒

元始安镇。普告万灵。岳渎真官。土地祇神。左社右稷。
不得妄惊。回向正道。内外澄清。各安方位。备守家庭。
太上有命。搜捕邪精。护法神王。保卫诵经。皈依大道。
元亨利贞。急急如律令。

净天地咒

天地自然。秽气分散。洞中玄虚。晃朗太元。八方威神。
使我自然。灵宝符命。普告九天。干罗答那。洞光太玄。
斩妖缚邪。杀鬼万仟。中山神咒。元始玉文。持诵一遍。
却病延年。按行五岳。八海知闻。魔王束手。侍卫我轩。
凶秽消散。道气长存。急急如律令。

金光神咒

天地玄宗。万气本根。广修万劫。证吾神通。三界内外。
惟道独尊。体有金光。覆映吾身。视之不见。听之不闻。
包罗天地。养育群生。诵之万遍。身有光明。三界侍卫。
吾帝司迎。万神朝礼。役使雷霆。鬼妖丧胆。精怪亡形。
内有霹雳。雷神隐名。洞慧交彻。五气腾腾。金光速现。
覆护真人。急急如玉皇光降律令敕。

祝香神咒

神由心通。心赖香传。香热玉炉。烟达九天。诚心礼拜。
请圣临轩。

开经偈

仰启东厨府。司命太真君。招集太和气。扫除不正氛。
代天宣教化。体道布功勋。朝夕承匡庇。垂怜一念殷。

志心皈命礼

九天应元府。无上玉清王。化形而满十方。谈道而跌九凤。三十六天之上。阅宝笈考琼书。千五百劫以先。位正真权大化。手执金光如意。宣说玉枢宝经。不顺化作微尘。发号疾如风火。以清静身。而弘大愿。以智慧力。而伏诸魔。总司五雷。运心三界。群生父。万灵师。大圣大慈。至皇至道。九天应元。雷声普化天尊。

司命宝诰 跪诵三遍

志心皈命礼

位居喉舌。经历庖厨。录人间功过之条。依期上奏。体上天生成之化。护卫下民。驱不正之鬼。扫堂中之疫疠。一家喜庆。合宅荣昌。朝夕承匡庇之仁。庚申消是非之目。雍雍瑞相。赫赫灵祇。东厨司命。九龄元皇灶府真君。

太上洞玄灵宝定福消灾司命真经 本卷

道言

东厨司命。定福真君。仰承上帝护卫。下民燮理阴阳。调和鼎鼐。赞襄化育。保佑生成。俾寿而康。注福与禄。扫除疫疠。消灭灾非。五祀推尊。一家主宰。门丞户尉。佐助行持。财土井臼。诸神统属。洋洋如在。赫赫昭临。朝夕瞻依。悉蒙匡庇。尔等男女。各各须知。道法无为。神机莫测。任凭造作。不出权衡。功过毫厘。莫逃鉴察。善恶之报。如影随形。太上曰。祸福无门。惟人自召。苟或非义而动。背理而行。知过不改。知善不为。以

曲为直。以伪杂真。以恶易妖。以私废公。耗人货财。离人骨肉。败人苗稼。破人婚姻。苟富而骄。苟免无耻。强取强求。好侵好夺。怨天尤人。诃风骂雨。用妻妾语。违父母训。弃顺效逆。背亲向疏。淫欲过度。心毒貌慈。男不忠良。女不柔顺。不和其室。不敬其夫。常行垢忌。失礼舅姑。轻慢先灵。违逆上命。越井越灶。跳食跳人。灶火烧香。秽柴作食。如是等罪。即有司命。随其轻重。夺其纪算。算尽则死。死有余殃。

尔时司命在庭。赞扬元化。重告世人曰。世衰道微。人无德行。不忠君王。不孝父母。不敬师长。不友兄弟。不诚夫妇。不义朋友。不畏天地。不惧神明。不礼三光。不重五谷。抛弃字纸。大斗小秤。杀生害命。贪财利己。邪淫叛逆。种种罪愆。三官鼓笔。太乙移文。发付阴谴。混乱形神。使之颠倒。人所贱恶。谋为不顺。举动皆非。日覈旬校。积至月晦。合当申奏。不得稽延。吾故依期。上诣天曹。奏呈罪簿。禀令施行。三部分司。万神听命。致生恶疾。轻重难逃。天律森严。大为可畏。若有善男信女。知非悔过。返已深思。人受天地中生。善性根焉。孝悌衷焉。四端具焉。五形能焉。忠信胚焉。和逊传焉。所为人也。非比草木。禽兽之为类。故曰人身难得。乐土难生。人为万物灵。心为一身主。沉沉静静。昏昏默默。不愆以欲。不杂以伪。无视无听。无思无虑。发而为言。温和慈让。发而为行。中正端直。其于亲。不期孝而自孝。其于君。不期忠而自忠。其于兄弟。不期友敬而自友敬。其于夫妇。不期和顺而自和顺。不厚责于人。不徇物以私。卒性而行。举皆中道。诚能如是。语善行善。条条是道。胡不勉诸。

天尊言。道在务本。人贵知本。本若不立。道何以生。爱亲敬长。以固根本。尊祖睦族。以存原本。伦常休乖。以笃敦本。礼法不越。以守有本。饮水思源。以慎追本。受恩莫忘。以培厚本。天之生物。使其一本。人之受生。全其大本。然非水火。不能生活。报答神功。以示反本。此皆是道。无非崇本。夫司命者。操持水火。掌握枢机。九转生神。二仪成化。坎离交济。酝酿太和。万气充盈。三元镇固。玉液炼质。黄华溉根。滋益百骸。烹调五味。式饮式食。关节通灵。不饥不寒。室家和乐。安常处顺。祸患不生。保命延年。福缘善庆。于是

天尊即说偈曰：南斗火司除毒害。北斗水神灭凶灾。一切所求皆称遂。万般滞闷悉通开。能依经法诚心奉。必当随愿契灵台。凡在有情皆顶礼。祸厄无因辄敢来。

天尊说经已毕。祥烟满室。瑞霭凝空。三界神祇。十方圣众。稽首称善。皆大欢喜。信受奉行。作礼而退。

太上洞玄灵宝定福消灾司命真经 终

净六尘咒

愿将法水洗凡身。六欲七情心垢清。愿将法水除毒害。三焦五藏保安宁。愿将法水遣凶煞。百怪千魔尽灭形。愿将法水驱疫疠。万邪等碍化微尘。急急如九天雷祖律令敕

完经赞

东厨司命。威德无穷。雍雍瑞相显宗风。去恶灭邪踪。降吉除
凶赞诵普昌隆。 皈命东厨赐福大天尊
愿以此功德。普及于一切。诵经保平安 消灾增福寿。